

**Bələ nii sagı tə,  
Piyerə  
nə púpúní  
Piyerə bələ nii sagı tə yuu  
wa sugu**

*Lìù tə, v nə púpúní sagı kv tə*  
Sagı kv tə yı \*tuntunv Piyerə nɛɛ bələ nii sagı  
tə, v nə púpúní.

*Lìa tə nə, v nə púpúní*  
Piyerə púpúní v sagı tə v pa \*Kərisə lìa tə nə,  
ba nə wulə luv tə mama wa.

*Sagı tə wa sugu*  
Nəjə kv tə yıɾı, v nə púpúní ba nə: Sagı kv  
tə kv zıga lìa tə nə, ba nə kàrì kunkun kàrì tə,  
tə nə zıga Zwezi-\*Kərisə svywájú tə nə. Ba lìa  
təntə yàá pwèe Kərisə lìa tə duən nə, ba ga vaŋa  
ba, ba kəni ba tutunɛɛ kukwınan tə wa. Piyerə  
swın ba con, sə ba twá Yı cwəjə tə zəni də pùé  
nədv, v nə kúrí ba tə yıɾı. Kv mù yıɾı nə, ba mɛ,  
sə ba twá Yı sagı tə cígá kàrì tə nə, ba wà mɛ,  
sə ba cugu kunkun karnyına-ba sùràn tə. \*Yuu-  
Tiu Zwezi wá píı v bà. Kv mɛ, sə lìa dàn wá də  
bıcan sié, də pupwən. Ba mɛ, sə ba ya lìa tə, ba  
nə poli Yı pùé.

*Təntən jònà bwálí*

1 À mù Simon Piyerə à yɪ Zwezi-\*Kərisə tɔtɔnbiu, à ga yɪ v \*tɔntɔnv. À púpúní sagɪ ku tɛ, á mù lià tɛ nɛ, á nɛ nɪ yuywanɔ, á kɛ á waa Zwezi nɛ, ndɛ nɛ dɛ nɛ nɪ yuywanɔ nɛ kɛ nɛ waa v nɛ nɛtv. Ku nɛtv tɛ twá dɛ Zwezi-Kərisə cígá tɛ nɛ. U mù nɛ yɪ nɛ Yɪ, v mù ga nɛ jon nɛba nɛ cuna wa. <sup>2</sup> Yɪ dɛ nɛ \*Yuu-Tiu Zwezi nɛ wá fwa ba pubwanɔ tɛ á yɪra, ba ga pa aba ba bɪcan siè, tɛ nɛ sùrí wuuu, ku twá á yɛnu tɛ nɛ, á nɛ yèó ba.

*(Zwan 17.2-3; Titə 2.11-14; Filipə tián 1.9-11; 3.8-14; Ebərə-ba 6.11-12)*

<sup>3</sup> Yɪ twá v diàn tɛ nɛ, v pa nɛba wiən tɛ mama, tɛ nɛ mɛ dɛ nɛba, sɛ nɛ ma twá v nɛ zɛni, nɛ nɛ yèó wá yɪrɪ. U mù nɛ twá v tɛtɛ dun yofaran tɛ nɛ, v ma kúrí nɛba. <sup>4</sup> Mɛ ku twá yìèn tɛntɛ, Yɪ ma kàn nii dɛ, v wá pa nɛba wiən nɛfaran, tɛ nɛ zìən zɛnzɛn. U fwa ku nɛtv, sɛ ku pa á dàń nɛ nɪ tɛ wiən tɛntɛ, sɛ á wàní á lɪ á tiàn yokukwɪnan tɛ wa, tɛ nɛ sùsú lɔv. Yìèn tɛntɛ yɪ lɛzoni pwíí yokukwɪnan fɪra, tɛ ga cùgà lɔv tɛ. Yá á dàń wá ya ndɛ Yɪ nɛ. <sup>5</sup> Ku mù tɛ yɪrɪ, á kɛnɛ á kajaŋa mama lá. Á ken á waa Zwezi-Kərisə nɛ. Á pɪan yofwamɪnan nɛzɛŋɛ sùrí ku nɛ. Á pɪan yɛnu sùrí yofwamɪnan nɛzɛŋɛ tɛ nɛ. <sup>6</sup> Á pɪan, á yɛni á tiàn janɔ, á sùrí yɛnu tɛ nɛ. Á pɪan, á ja pínú wuuu, á dàná ká píí á kɛ á kwa, á sùrí á nɛ yèó á tiàn janɔ tɛ nɛ. Á pɪan, á twá Yɪ cwɛŋɛ tɛ nɛ zɛni, á nɛ jɛ, á sùrí pínú wuuu, á dàná ká píí á kɛ á kwa tɛ nɛ. <sup>7</sup> Á pɪan, Kərisə lià tɛ duən sonu sùrí, á nɛ twá Yɪ nɛ zɛni tɛ nɛ. Á pɪan,

lià tə mama sonu sùrí lià tə duən tə, ba nə yí á nubia Kərisə yurí tə, sonu tə nə. <sup>8</sup> Də á nə tɔŋa tə yìèn təntə, tə sùrí wuuu, tə wá pa, á mu tə ba ya tɔtɔ. Ku wá ja nywarí ku pa \*Yuu-Tiu Zwezi-Kərisə nə. Yá á ga wá yəni wá yənu, ku nə sùrí wuuu. <sup>9</sup> Yá liù tə, ɔ nə ba tə yìèn təntə tɔŋa, ɔ ya ndə liliu nə, ɔ ga ba yɪŋɔni na. Ʋ swèéé də, Yú yá sɪn ɔ cɔna nədwara tə ɔ li.

<sup>10</sup> À nubia-ba, Yú kúru aba, ɔ ga li aba ɔ tɪn. Ku mù nə pɪn, á kənə kajaŋa, sə ku yoo təntə ja diàn, Ku twá á tɔtɔnɛɛ nə. Á nə fwa ku nətu, á bá mà á nɛɛ nə, á tɔ Yú cwəŋə wa abada. <sup>11</sup> Yá ku nətu dàń wá pa, Yú pa á zɔ nə Yuu-Tiu Zwezi-Kərisə sàń tə wa, ku nə wulə máŋá mama wuuu. Ʋ mù Zwezi-Kərisə jon nəba nə cɔna wa.

*(1 Piyerø 1.10-12; 2 Timote 3.16)*

<sup>12</sup> Á nəŋə, ku tə nə pɪn, à tə ma wá lii aba tə yìèn təntə wuuu. À yèé də, á dí yáá á yèé tə yìèn təntə, yá á ga zɪga diàn cígá tə wa, ba nə bɪrɪ aba. <sup>13</sup> Yá à dàń ni də, ku ziən də, à tə nə wulə lɔɔ wa, sə à twá sagɪ ku tə nə, à ma zɪn aba dwɪan nə. <sup>14</sup> À swɪn ku, à nə yèé də à tɪan bwələ, ndə nə Yuu-Tiu Zwezi-Kərisə nə bɪrɪ ku nə nətu. <sup>15</sup> Ku mù nə pɪn, à wá kə cígá mama, à kə aba cwəŋə tə nii nə. Á fwa nətu, sə ku pa, á líi tə yìèn təntə, máŋá mama, à tɪan kwa nə.

<sup>16</sup> Máŋá don wa, nə swɪn nə Yuu-Tiu Zwezi-Kərisə diàn tə yoo, nə bɪrɪ aba. Yá nə ga swɪn də, ɔ wá pií ɔ bà. Ku yoo təntə tà yomanan, tə nə nan ləzoni swɪan wa, nə twá nə ma swɪn ku. Nə tətə nə ni ɔ dun tə nə yíá wa. Ku mù nə pɪn, nə swɪn ku yoo təntə. <sup>17</sup> Ʋ ni dun tə nə ba

don jə, υ nyina Yı con. Nə ni də, Yı tə, υ dun nə dwə tə mama, υ swın, υ wú: «D tə ba tə yı à biswənə tə, υ nə poli à pùé.» <sup>18</sup> Nə ni kú mù kori təntə də, kú naŋa yı, də nə yà wulə də wá, kú mù paan\* tə yuu wa, Yı nə bıru υ tìàn. <sup>19</sup> Yá nə dǎn pın cígá Yı nii \*sùsùnà tə sùràn tə nə, ba nə swın, nə doni won mama. Kú zıən də, á nə zùrì á yıra, də ba sùràn tə, ba nə swın. Tə yı ndə cànú nə. Cànú tə yáá pıpılı yikunu wa, kú ja vələ tıblakunυ, máŋá tə naŋun† tə, nə wá pén, kú pa á na zəni zəni. <sup>20</sup> Á nəŋə yoo tə, kú nə wulə yìèn tə mama yuu wa. Kú mù nə yı Yı nii sùsùnù wà mə, sə υ gwın Yı nii tə sùràn tə, tə nə púpúní Yı sagı tə wa də υ təntıan yənu. <sup>21</sup> Yı nii sùsùnà tə sùràn tə, tà tə nan ləzwənə fıra wa. Kú yı Yı-\*Sıju tə nə yıgu ba, kú pa ba swın tə sùràn təntə, tə nə nan Yı.

## 2

### *Kunkun karnyına-ba wá bà*

*(Tıtınan 20.29-30; Zwidə 3-16; Apokalisə 2.14, 15; 2 Timote 3.1-9)*

<sup>1</sup> Máŋá don wa, kunkun sùsùnà yın \*Yızərayelə lià tə wa. Yá máŋá don kùù wá bà, kunkun karnyına-ba wá ya á də tətəŋi wa. Ba mù kunkun karnyına-ba wá twá tıa tıa, ba kə ba kunkun kàrì tə, tə nə dıga lià á pwərə wa. Ba wá vı \*Yuu-Tıu, υ nə yè ba υ jon ba cuna wa. Yá naa nədu ba wá van cuna nəfarυ, ba dı ba

\* **1:18** 1.18 Ywǎn Matıə 17.1-13. † **1:19** 1.19 Naŋun təntə yı Zwezi yoo nə kú bıru. Ywǎn Apokalisə 22.16.

yuu wa. <sup>2</sup> Llà zənzən wá twá, ba nə ba ba tiàn janı tə nə. Yá là dän wá swìn yolwan, ba zıgı cıgá cwəñə tə nə ba mù yırı. <sup>3</sup> Ba mù kunkun karnyına-ba wá kuna kunkun, ba ma gıgarı aba, ba jon á wiən ba dé, á wiən tə yimən nə jə ba, yırı. Yá ba mù là təntə bürà bürı ku zwèe, ku máná nə ba yıgə. Liù tə, v nə wá cùgù ba tə, ba dwèe. U bá dán, v ma cùgù ba míámían.

*Yu yəş nətv, v nə wá jon cıgá tiàn tə*

<sup>4</sup> Yu wà \*malıke tə tətə nə cùgù v nə máná don wa, yá tutv. U jin tə v dılı tıga bwálı nə, v vwa tə, v tún yikunu wa. U ma dänı dıın tə, v nə wá bürı tə bürà. <sup>5</sup> Yu wà Nowe máná là tə nə tun cuna tə də, yá tutv. U pın dwà nəfarv bà ku nà. Ku níá tə pèe ba mù là tə, ba nə tıña tutvnkukwınan, Yu nə ba pıà. U wà ba liù mama jon, də ku nə tà Nowe, də là barpe duən cııı nə Yu jon, ku fuən luv təntə wa. Nowe yà swìn ku tə nə yı cıgá, v bırı là tə. <sup>6</sup> Yu bürı \*Sodómə də Gomərə tiàn tə də bürà, sə v cùgù tə. U pın mən dé tə tıan təntə. Yá v dän twá ku mù yoo tə nə, v ma bırı won tə, nə bıàn là tə yuu wa, ba nə tıña tutvnkukwınan tə, Yu nə ba pıà. <sup>7</sup> Yá ku máná tə wa, Yu jon Lotə, v nə yı cıgá tíú, v pa v nan, Sodómə tıv tə wa. Máná tə, Lotə yà nə wulə Sodómə tıv tə wa, v dí càn zənzən, ba mù là təntə, ba nə tıña tutvnkukwınan tə, Yu nə ba swə, jin wa. <sup>8</sup> U nə nı ba yokukwınan tə dıın mama, v ga nəń ba sükukwınan tə, ba nə swìn, dıın mama, tə yıèn təntə yà yı wá v bıcan wa zənzən, v nə yı cıgá tíú tə yırı. <sup>9</sup> Tə yıèn

təntə mama biri də, Yı yèé cwəŋə tə, ɔ nə wá tì, ɔ ma jon là tə, ba nə twá ɔ cwəŋə tə zəni, yìèn ga wəwalı ba. U yèé cwəŋə tə, də ɔ nə wá twá, ɔ ma ja là tə, ba nə tɔŋa kunkun yìèn tə. U wá ja ba ɔ tún, ku ja va ba dıın tə, ɔ nə wá bürı ba bürà.

*Kunkun karyına-ba nə yı nətv*

<sup>10</sup> Yı wá pa, càn yí là tə, ba nə twá ba pùé yokukwınan fıra nə, ba nə tɔŋa durən yìèn, ba ga vı \*Yuu-Tiu Yı dıàn tə, də ba twın tə. Ba mù kunkun karyına-ba, à nə swın ba yoo, ba yuu dà. Yá ba ga ba fən dəri sə ba twın dun wiən tə.

<sup>11</sup> Yá \*malıke tə jə dıàn, tə doni ba mù là təntə, tə ga ba sèe, tə twın wiən təntə Yuu-Tiu Yı yáá con.

<sup>12</sup> Ba mù là təntə dãn fwa yìèn ndə ganaŋa nə, tə nə yèri tə yáá. Ganaŋa yı tə wulə, sə ba də ba janı, ba gwı. Ba níé súé də tıran, ba nə ma twın wiən, ba nə yèri tə dèń. Ba cígá ga yı ba wá tı, ndə ganaŋa təntə nə. <sup>13</sup> Yı wá pa, ba dé càn. Càn təntə nə yı ba ŋwírán ba tutunεε nə tà cígá tə yırı. Máná mama, ba swə, sə ba fwa ku tə nə lwara də, ku nə swə ku yı yıcau tətə wa də. Ba nə wulə də aba, ba tutunεε tə yáá kə cavıra á nə. Yá tə ga ba ywán tə pa aba. Ba swə, sə ba yìèn ba ma kını kunkun, ba biri aba də, ba nə dé cànə də aba. <sup>14</sup> Ba bà won don pıà, də ku nə tà kana, sə ba fwa bacwan də ba. Ba ba lwanı fwa ba swı. Ba nə nı liù tə, ɔ nə ba dıàn jə Yı cwəŋə tə wa, ba yáá yıgu ku tíú, ba pa ɔ fwa cuna. Máná mama, là duən wiən jə yimən tə pa ba. Tə yìèn təntə nə biri də, Yı

wá b̀̀r̀̀r̀̀ ba b̀̀r̀̀r̀̀. <sup>15</sup> Ba dugv ćgá cwəŋə, ba ga tì jíún cwəŋə. Ba twá Bewərə biú Balamə jíún cwəŋə tə nə, kv nə yí səbiswənə cwəŋə. U sóní, sə v fwa tətəwə tə nə tà ćgá, sə v ga na səbiu. <sup>16</sup> Yá Yı twá də b̀̀nà, v ma caga v nii \*s̀̀s̀̀s̀̀ǹ̀ Balamə nii nə, v cuna tə yırı. B̀̀nà nii ba sẁ̀n, yá ka sẁ̀n Balamə con də ləzwənə kori. Ka c̀̀gá v nə, sə v d̀̀n ká fwa kv mù yutəlu yoo təntə.

<sup>17</sup> Ba mù kunkun karnyına-ba tə, à nə sẁ̀n ba yoo á con tə, yí ndə nabuliyıa nə, tə nə kua. Ba yí ndə bakwan nə, voo nəfarv nə fuli kv yigə, dwà ga ba ǹ̀. Yı kwen yikunu bwálí, v t́n ba nə. <sup>18</sup> Ba yí là tə, ba nə sẁ̀n sufaran. Ba s̀̀r̀̀n tə ga ba d̀̀n jə. Ba sẁ̀n s̀̀r̀̀n təntə, sə tə twá là tə p̀̀é fira yokukwınan nə. Kv là təntə d̀̀n nə zəzən ba lı ba t̀̀n, là tə wa, ba nə jén, kv tə nə wà d́án tə p̀̀ı, ba jén. <sup>19</sup> Ba mù kunkun karnyına-ba yáá k̀̀n nii là tə con də, ba wá pa ba tını ba t̀̀n. Yá ba tətə d̀̀n ga yı ba cuna tə ywəŋə, ba ba ba t̀̀n tı. Won nə dí d̀̀n liú yuu wa, kv tíú yı kv yonju.

<sup>20</sup> Kv yı ćgá, là tə, ba nə ỳ̀é Yuu-Tiu Zwezi-Kərisə, v jon ba ba cuna wa. Yá ba lı ba t̀̀n luv kv tə gıgara ỳ̀n tə wa. Là təntə nə p̀̀ı, ba kə ba t̀̀n tə ỳ̀n təntə wa, ba pa tə dé d̀̀n ba yuu wa, ba ýgúré wá ya c̀̀n, kv doni dí yáá. <sup>21</sup> Kv yá wá kwani kv pa ba, də ba yá nə wà ćgá cwəŋə tə yəni, kv doni ba nə yəni ka, yá ba ga kúè ba Yı nii tə, ba nə pın ba zılı. <sup>22</sup> Yoo tə nə wá yı ba là təntə, bırı nəba də, kv tə nə sẁ̀n zwansıarı tə wa, yı ćgá. Kv sẁ̀n, kv wú: «Kv yı ndə kukurə nə tını, ka p̀̀ı ka dé». Kv sẁ̀n

zwansırsarı don wa, ku wú: «Ku yi ndə ba nə swə too, ku ga pìí ku va ku tɔ tɪtaran wa, ku bəbəli».

### 3

*Yuu-Tiu ka pìí ka bà yoo*

*(Zwidə 17-19; Matiə 24.37-38; 2 Tesalonikə tìàn 1.7-10; Apokalisə 20.11)*

<sup>1</sup> À nubisoni-ba, á nəŋə, à sagi bələ nii nyiən nə, à púpúní á nə. Tə saga bələ tə me wa, à nə púpúní, à swìn yièn á con, à nə ma líí aba. À pià, sə á bún tə yièn tə yoo də pubuŋa, ku nə ziən.

<sup>2</sup> À pià, sə á líí á tìàn sùràn tə yoo, Yu nii \*sùsònà tə nə swìn á con fuən fuən. Á líí Yu cwəŋə tə sùràn də yoo, á \*tuntuna tə nə swìn, ba biri aba. Tə sùràn təntə nan \*Yuu-Tiu. U mù nə jon nəba nə cuna wa. <sup>3</sup> Á lwara də, luv zaŋv máŋá wa, mumuɲyina, ba nə swə ka kukuli là, wá bà. Ba wá ya là tə, ba nə tuŋa ba pùé yokukwɪnan fira.

<sup>4</sup> Ba wá swìn, ba wú: «D wà swìn də, v wá bà, naaa? Sə v wa yèn nə? Nə nıbara-ba nə təlɛ́, ku ba yigə. Won mama ga tə wà lwàń. Wiən tə mama tə yi ndə, nətv tə luv dèń laŋv máŋá nə yin.» <sup>5</sup> Ba swìn ku nətv tə, yá ba ga kúè ba pià ba líí yoo nədv ku tə. Ba swééé də, luv dèń laŋv máŋá wa, Yu twá v nii sɔgv nə, v ma fwa lanworu də tia. U pin tia pén ku nan níá wa, ku ga yi ku twá níá nə, tia ma fwa. <sup>6</sup> Mə níá nə nə, Yu kúè twá, v ma cògè tia yuu wiən tə mama, də dwà nəfarv təntə, ku nə twi ku nà ku máŋá tə wa. <sup>7</sup> Yu nə kúè twá sɔgv təntə nə, v pa nii də, zèn lanworu ku tə də tia tə, wá tún tə diàn



dun tɛ, ɔ nɛ wá pa tɛ mama dé mɛn. Ku yoo tɛntɛ wá tun dun tɛ nɛ, ɔ nɛ li ɔ tɛn, sɛ ɔ bɔ̀rì bɔ̀rà tɛ. Ku dun tɛ nɛ, ɔ wá cùgù là tɛ mama, ba nɛ tɔ̀ŋa tɔ̀tɔ̀nkukwɛnan tɛ, ɔ nɛ ba pià.

<sup>8</sup> À nubisoni-ba, yoo nɛɔv nɛ, á wà mɛ, sɛ á swèéé ku yoo. Á mɛ, sɛ á lwarɪ dɛ, Yuu-Tiu Yu con nɛ, dun nɛɔv yi ndɛ bɪna mùrù nɛ. Yá bɪna mùrù dɛ yi ndɛ dun nɛɔv nɛ. <sup>9</sup> Là duɛn bɔ̀ŋa dɛ, Yuu-Tiu nikanɪ tɛ dání, ku nii ba sú. Ku nɛtu tà cígá. Yá ku dán nɛ yi pínú, ɔ fwa dɛ aba. U ba pià, sɛ á ladva jén. U pià, sɛ á mama vɛvɛri á kwa, á ma sá á cɔna tɛ.

<sup>10</sup> Yuu-Tiu ka pii ka bà tɛ, wá dɪ là yuu ndɛ ŋwà̀n nɛ. Ku dian tɛntɛ nɛ, lanworu tɛ wá jén dɛ zɛzugu nɛfarɔ. Mɛn wá dé wiɛn tɛ mama nɛ wulɛ lanworu tɛ wa. Yá tia tɛ dɛ ka yuu wiɛn tɛ mama wá dé mɛn, tɛ jén lá nɛ.

*(Likɛ 21.34-36; 1 Tesalonikɛ tìán 5.1-10; Apokalisɛ 21.1)*

<sup>11</sup> Tɛ wiɛn tɛ mɛ wá jén, ndɛ nɛtu nɛ, ku nɛ swìn. Á dán mɛ, sɛ á fwa ku tɛ, Yu nɛ swɛ, á ga twá ɔ cwɛŋɛ tɛ zɛni. <sup>12</sup> Dɛ ku dun tɛntɛ, Yu nɛ wá bɔ̀rì bɔ̀rà, tɛ nɛ ma biàn, á kɛnɛ á kajaŋa lá, sɛ ku bà lala. Ku dun tɛntɛ nɛ, lanworu tɛ wá kwé mɛnɔvoo, ku ga nyɔ lá. Ku mù lanworu tɛ dɛ ku wa wiɛn tɛ mama wá kwé mɛn tɛ nyɪan tɛ jén. <sup>13</sup> Nɛ mù dán yi nɛ dànì lanworu nɛɔvɔn dɛ tia nɛɔvɔn, yoo mama nɛ wá tun dɛ cígá lá nɛ, ndɛ Yu nɛ kàn nii nɛtu tɛ, ɔ pa nɛba.

<sup>14</sup> À nubisoni-ba, ku mù nɛ pɪn, máŋá tɛ, á nɛ dànì ku dun tɛntɛ, á kɛnɛ diàn, sɛ Yuu-Tiu bà, ɔ yí aba, dɛ á ba yolwan dɛ cɔna jɛ, Yu yáá con.

Ku me, se u ba u yi, de a yi la te, a ne wule bican sie wa de Yu. <sup>15</sup> A lwara de, ne Yuu-Tiu Yu pinu te, yi ku saja aba, se u ma jon aba a cuna wa. Ne nubiswene, Pole twa wubuja te ne, Yu ne pin wa, u ma pupuni ku yoo tentete te, u pa aba. <sup>16</sup> Saga te mama wa, u ne pupuni te yien tente yuu wa, u yaa swin ku netu. Suran wule te saga te wa, la ne ba te den nen mwali mwali. La te ne ba yenu je, de la te, ba ne ba dian je Yu cwene te wa, wari te den ba ni. Ba yaa lwan te mu suran tente, nde ba ne lwan Yu sagi te suran te duen netu te. Ba fwa ku yoo te netu, ku ga wa pa Yu cugu ba.

<sup>17</sup> A nubiswene-ba, a mu con ne, a mu di yaa a yee te yien te yoo. A dan cia a tan ne, se ba mu la tente, ba ne ba Yu nii zili te, dan ka yigu aba, ba ke ba jiu cwene te wa. Ku netu dan ka pa a ba zeni ziga Yu yien te wa. <sup>18</sup> A dan vele yaa wuu, de ne Yuu-Tiu Zwezi-Kerise. U wa fwa pubwanu a yira, ku ne suri wuu, se a ga yeni wa yenu, ku ne suri wuu. U mu ne jon neba ne cuna wa. U mu ne me de dun, ku ne zigi sin ku ja vele mana de mana wuu, ku ne ba zwee. Amuna!

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 30 Sep 2022 from source  
files dated 8 Feb 2022

d18530a7-7259-5f23-92b6-70e3abe5f3fa